



partii naleraq

28.april 2016

UPA2016/135

Aalisarnek pillugu Inatsisartut Inatsisaat allanngorteqqullugu imaalillugu Kalaallit Nunaata kitaani raajanut TAC –ip agguanneqarnerani sinerissap qanittuani aalisartunut avataasiortunullu assigiimmik 50/50-ngortillugu suliareqqullugu Naalakkersuisut peqquneqarnissaannik Inatsisartut aalajangiiffigisassatut siunnersuut.

(Inatsisartunut ilaasortaq Nikolaj Jeremiassen, Siumut)

Inatsisartunut ilaasortaq Nikolaj Jeremiassen Siumut siunnersuuteqarpoq, tassalu aalisarnermut inatsisip allanngortinneqarnissaa pillugu oqaaseqaatissarput tunngavilersuutigullu Partii Naleqqamiit saqqummiutissavakka.

Siullermik paaserusunnarsivoq aalisarnermut inatsisissaq sumut killinnersoq? tassami isummersussaguttami inatsisinik allannguinnissamik taava nalunngittariaqarparput naalakkersuinikkut qanoq ilusiliisoqarniarnersoq, assersuutigalugu una saqqummiusaaq akuerineqassappat itigartinneqassappalluunnit qanoq siunissamut sunniuteqassava? taamaattumik naalakkersuisuniit neriorsuut eqqortillugu upernaq manna saqqumiuttariaqarpoq, ataatsimoortumimmi isummersortariaqaleratta ataasiakkaarlugit inatsisit allanngortiternagit nalunngilarpummi kalluagassat allanngortitassallu annertuujusinnaasut.

Partii Naleqqamut pingaaruteqarluinnarpoq nunatsinni pisuussutigut uumassusillit pigisagut inunnet amerlanerpaanut iluaqutissanngorlugit agguanneqartarnissaat. Inuillu nunaqavissut tamakkiisumik amerlanerpaat pissarseqataanissaat isumaqatigilluinnaratsigu.

Nunatsinni aalisarnikkut sutigut tamatigut ingerlalluarnissarput soqutigiuartariaqarparput, tassalu tunisassiornikkut sulisoqarnikkullu, aammalu aalisariuteqarnikkut, avammullu tunisassiornikkut, minnerunngitsumillu pisassiissutigineqartut tamavimmik nunatsinni aalisarlugit qaqinneqartarnissat pingaartilluinnaratsigu, inuiaqatigiinnummi pingaartorujussuummata, aningaasanimmigooq amigaateratta akitsuutiniq eqquissuinnavikkatta.

Aalisanngitsoortakkagut aallunnerusariaqalerpagut aningaasarpassuarnimmi nalillit aalisakkat qaqinngitsoortarpagut, aammalu avammut niuernermi iluaqutigisinnaasagut aningaasarsissutigisinnaasagullu isertinngitsoortarpagut, taamatummi ingerlanerput akuersaaginnarsinnaajunnaarparput, nunammi allat unammillerpaatigut aalisarnikkut tunisassiornikkullu, uagullu pisuussutigut tamaasa atornagit ingerlanerput killeqartariaqarpoq oqartariaqalerpugut tassa asu nammaleqaaq.

Aalisagartassat pisassiissutigineqartartut tamakkerlugit qaqinneqanngitsoortarneri ilungersunarpoq, tamannalu ajornanngivissumik aaqqinneqarsinnaagaluarpoq, tassalu aalisartut

aalisarusuttut peqatigalugit, asulimi akuersissummik qinnuteqartuaraluartut erliguutiinnarnagit aalisartinniartigit, inuussutissarsiuutimmi nunatsinni pingaarnersaat taamak inuussutissarsiuuteqartunut aporfissaqartigisumik ingerlatinnarsinnaangilarput.

Apeqqutaaginnarporli politikikkut piumassuseqarnersugut, uagullu Partii Naleqqamiit peqataarusuppugut aalisagartassat pisassiissutigineqartartut tamakkerneqartarnissaannut suleqataanissatsinnut, aammalu aaqqissuussinermut nutaaliornissamut.

Taavalu siunnersuut oqaaseqarfigissavarput. Sinerissami rejerniarnermi pisassat avataani sinerissamilu assigiimmik avinneqarnissaanik tunngavilersuutitaqartoq soqutiginaripparput makku pissutigalugit.

Sinerissami rejerniartut ukiuni makkunani ikiliartuinnarput, imaangimmat aalisartut ikiliartormata, imaapporlu aalisartut rejerniartut pisassaarukkiartuinnaramik aalisartut ikiliartorput.

Taamaattumik siunnersuut tunngaviatigut isumaqatigilluinnarparput, sinerissami rejerniartut isumannaanerusumik aammalu pisassat amerlanerpaanut inunnut sunnuteqarnissaanik anguniaqarnek, aammalu sinerissami angallatit nutaangiliartuinnartut taarsersorlugit nutarterlugillu inerisaasoqarnissaa sinerissami aalisartunut pingaarluinnarmat.

Imaassanngilarmi aalisartut pisassakilliartuinnartut, aammalu angallatit aserfallakkiartuinnartut ikiliartuinnartullu, akerlianilli tunisassiorfiit aalisarnermik pisassanillu amerlanerpaanik tigusiartuinnarlutik ingerlassasut, tamannalu innuttaasut nammineernerulernissaannut anguniaqarnermut naapertuutinnigilaq, innuttaasunummi amerlanerpaanut pisuussutinik uumassusilinnik iluaquteqarnissamik nuussiniarnitsinnut naapertuutinnigilaq tunisassiorfiimmi namminnek pisassanikkiartuinnartut iluatungaatigulli aalisartut pisassakilliartuinnartut uagut nalunngilarput sorleq toqqassallugu tassalu aalisartut pisassaqarnerulertariaqarput.

Tassami sinerissami aalisarnermi inuussutissarsiuuteqartut sapinngisamik pisassaqartuarnissaasa qulakkeerunneqarnissaat isumannaartariaqartoq isumaqarluinnarpugut.

Taamatut oqaaseqarluta siunnersuut tamakkiisumik taperserparput.

Hans Enoksen